

# O LE SULU SAMOA



EKALESIA FAAPOTOPOTOGA KERISIANO SAMOA  
O LE NUSIPEPA FAA-LE-LOTU NA FAAVAEINA I LE T.A. 1839



FAAVAEINA 1839

O LE SULU SAMOA

IANUARI 2019

email: sulusamoa@cccs.org.ws -Main Office: Ph. 24414, Ext 30 - website: www.cccs.org.ws

## MAFUTAGA MATAGALUEGA APIA

25 IULAI 2018

### FAATOMUAGA:

Ou te muai faatalofa atu i le Suafa o Iesu Keriso le Ao o le Ekalesia, i lau susuga i le Ta'ita'i Mafutga, le pa'ia i Tamā o le Matagaluega ma Faletua, le pa'ia i Faafeagaiga ma Faletua, ae tainane le mamalu ole Matagaluega. Talofa lava.

*faaauau itulau e 9*

O Tagata na Latou  
Foaina ma Faafailele  
le Ekalesia

## PETERU

E toatele lava tagata e manatu o Peteru o se tagata lapo'a, tuai lona mafaufau ma e tau vasi ona uiga. E sese lea manatu. E le o le malamalama na mafua ai ona faaletonu Peteru; o lona faaletonu na mafua ona o lona sagisagi ma lona naunauta'i e fai se mea. E oo i lona pona aupito maoa'e, o lona faafitiina o Iesu i lea po matua taua,

*(silasila itulau e 4,5,6)*

O le fe'au autu o le tusi mataupu o le 'saolotoga'. Ona lenei i Kolose e faapea: "O le faapea lea ole autu o le feau o Tumu atoatoa o Keriso". E Kolose- "O le Tumu atoatoa ma manatua foi nisi e aofia ai ma le le Sa'olotoga" o le mafuaaga o



O se toe tepa i tua i nisi na o faafeagaiga ma faletua sa faauuina i le a'oga Tusi Paia a la tatou Ekalesia...Malua Bible School i le tausaga e 2006.

## PEPA O LE FONON TELE 2018

14 – 25 ME 2018

### AUTU O LE FONON TELE - "O LE AGAGA O LE ATAMAI I GAGANA"

**Galuega 2 f. 4:**Ua faatutumu foi i latou uma e le Agaga Paia, ua afua ai ona tautala i gagana eseese, pei ona foaiina mai e le Agaga o le Gagana ia te i latou.

E iai ni manatu e fia agai i ai se mafaufauga, aemaise o le Autu o lenei Fono Tele i lenei tausaga 2018.

*(faaauau itulau e 6)*

---

# O LE LAUGA

**TUSI FAITAU:** Kenese: 2:7-9; 15-17; Efeso :4-6

**TEXT: Kenese:2:15**

“Ua ave foi le tagata e le Ali’i le Atua ma tu’u...”

**THEME: “O LE VALA’AU E GALULUE”  
“A CALL TO WORK”**

- O ai e ana le vala’au? O le vala’au a le Atua, ia tatou ola galulue. Ae aisea e galulue ai? Galulue e fatumau le ola. Galulue e saili manuia o le Atua. Galulue mo le vi’iga o le Atua.

- Manatua, o aulape o Afioga a le Atua ia Atamu ma Eva, ina ua toilalo i le agasala. “EVA ETE FANAU MA LE TIGA, ATAMU ETE ‘AIMA LE TIGA.” i le gagana Eperu e tutusa le uiga o le tigaina (mafatia) o Eva (tina), i le fanauina o le Ola (tagata fou), ma le tigaina o Atamu, e fa’atumauiina le ola lea.

- Fai mai le Atua ia Atamu... “E TE AI FOI AU MEA E ‘AIMA LE AFU O OU MATA SEIA E TOE FOI ATU I LE ELEELE...” O lona uiga a le galue e le afu, a le afu e le ‘ai. O lona uiga a le galue, e le ‘ai. O lona uiga e leai se mea lelei e maua pea le onosa’i, finau ma galue “NO PAIN, NO GAIN”

- Manatua foi e le se Atua fa’alua, o le Atua galue. Afai la na fai le tagata i foliga o le Atua galue, o le vala’au foi lea mo le tagata, ia ola finau, ola tauivi, ma ola saili ma

ia galue. A lea ua malele le ava a Leausa, i le molimau a le Kenese... fai mai... Ina ua uma ona fai le tagata i le amataga, ona ave lea ua tu’u i le fa’atoaga i Etena. Ua lava ma totoe lea e iloa ai le fa’amoemoe Paia o le Atua mo le tagata. Ia galue ma ia finau...

- *“It better to try and fail, then fail to try.” “E lelei lou finau tusa pe fa’afia ona e faia ina, ae leaga lou faiaina ae e te lei finau”*

- E lei uma ona fai le tagata, ona tu’u lea i se falekalapu, e ogaoga ai i le vaiaso atoa, ae le alu se loku... e lei tuuina foi i luga o ao, e tau ina feleleai solo, e sue ni maliu ma ni saofa’i, pei o le anava a isi matai... Po se polokiko o se fale, e ‘aisi ai i le aso atoa... E lei tu’uina fo’i i totonu o se potu ea malulu, e tau ina fa’alua ai i le afu o tagata... Leai na tu’u i totonu o le fa’ato’aga, e galue ma leoleo ai.

\*Fa’ato’aga: Fa’a – to’aga ona e galue e saili manuia mai le Atua...

\*Etena: O le ola fiafia (ola manuia) O lona uiga, o le finagalo lea o le Atua mo le tagata, ia ola fiafia, ola saoloto, ma ia ola galue e saili manuia ua fa’ataoto e le Atua i le manava o le eleele. O le vala’au lea a le Matai mo i tatou le Ekalesia, o oe i’ina o a’u i’inei, o outou i le na itu, matou i lenei pausisi... O oe i lou nu’u, o a’u fo’i i lo’u.

(Tala i le ulugali’i ese le faitio ma complain i le tele o meafai o le

lotu... Ua talanoa ma fai le tonu, e sili ia pe a o e sue se Aulotu (Ekalesia) e leai ni mea e faia ai, ua le lavava le faimeaa so’o... E fa lelei Ekalesia na o iai o le mea lava e tasi (EFKS, METOTISI, KATOLIKO, ASSEMBLY). Na o’o i Niu Sila le sailiga a si vaega, ona o lea i le Patele, fai mai le Patele, “Tele ia o aulotu fa’apena i Niu Sila” Ave loa iai e le Patele le address o le mea e iai le Aulotu lea. Ua o fiafia si ulugali’i ma talanoa, lea la ua maua le mea ta te filemu ai, ia anusa ali’i... Ae o atu o le fanua tanu i Magele. Toe vili loa i le Patele, masalo ai e sese le address, ae faimai le tali a le Patele. “Pau a lena ole Aulotu filemu e leai ni mea e faia ai, na o tagata ua maliliu na ole tao’oto lava.

- “GOD HELP THOSE WHO HELP THEMSELVES” E fesoasoani le Atua ia i latou e muamua galulue, finau ma tauivi. Tele ia o tagata e talosaga mai i le News Paper, fia maua le vai, fia maua le eletise, fia maua se fesoasoani... Talofa e... O le fesili. O fai se galuega?

- **AUTU: O LE VALA’AU IA TATOU GALULUE.**

O le malelega a Keriso i le au so’o i luga o le mauga. (GREAT COMMISSION) “Ia outou o atu e fai nu’u uma lava ma so’o... fa’auta foi ou te ia te outou i aso uma lava, e o’o lava i le gata’aga o le lalolagi.”

- Lona uiga o le Vala’au a le Matai ia tatou Galulue, o lo’o iai fa’atasi ma Lona Alofa Tunoa, na te ‘apo’apoina, fesoasoani, ma lagolago i lo tatou vaivai. Le Alofa Tunoa tatou te malolosi ma

---

# O LE LAUGA

mafanafana ai. Le Alofa lena, o lo'ou tapua'aoina lau tautua tuavae i ou nafa tausi, i so'o se matata, auā se manuia e le gata, i le aiga, le faiganu'u, le Malo, aemaise le Galuega Paia a le Atua.

Si mea taua lea e taua i le **Kenese:1:27** “*ONA FAIA LEA E LE ATUA, O LE TAGATA I LONA FA'ATUSA... NA FAIA E IA O ILAUA O LE TANE MA LE FAFINE*” O lona uiga e le to'atasi e to'alua, o le Team Work. E galulue ma atia'e fa'atasi. O le vala'au e le gata ia tatou galulue e atia'e lo tatou ola i mea uma. At the same time. O le vala'au foi ina ia tatou galulue ma mulumulu aufoe fa'atasi.

## **“IA TATOU OLOOLO PITO VA'A”**

Le uiga lea o le tu'ualalo a le aposetolo i le Ekalesia i Efeso, e uiga i le vala'au a Keriso Ia tutumau ma galulue fa'atasi. Manatua o le mataupu lea e finau ai le aposetolo i'inei. (“*IA TASI LE EKALLESIA— UNITY OF THE CHURCH*”). I le manatu o le aposetolo, pau a lea o le auala e mafai ai e Efeso ona tauave lona vala'auina mai le Matai, O le Galulue fa'atasi. Fai mai upu o le Pese

*“UNITED WE STAND: DIVIDED WE FALL” E faiaina ma pau'u mataga i le fevaevae'i, Ae tatou te tutu ma manumalo, i le galulue fa'atasi”*

A o le galulue fa'atasi, fai mai Paulo ia Efeso... “...e auaua ma le lotomaulalo, e finau i le

*agamalū ma le onosa'i, a'o le sili o mea uma, o le fefa'apalepalea'i (feavata'i) o le tasi i le tasi i le Alofa Fa'ale-Atua”* Le Alofa lena na te fanauina le Filemu, le fetausia'i, ma le loto fa'amagalo. Ao le uiga tonu a lena o le malelega a le Matai i lona au so'o a'o lei tu'ua le mafutaga... “*IA OUTOU FEALOFANI...*”

I le Fa'aperetania: “*LOVE ONE ANOTHER*” ‘*Ia outou fealolofaa'i*’ Silafia e le Ali'i, pau a lea o le aupega e tauave ai le mau, e manuia ai faiva, e maopopo ai mafutaga, e māmā ai se avega, ma mafanafana ai lotu. Pe a galulue fa'atasi ni tagata i le fealofani; ma alofa le tasi i le tasi.

Manatua o le ute lena o le savaliga, na fai to'atasi e Keriso, lea na tau i le Satauro, ae na taualuga i Lona Toe Tu manumalo, ina ia toe fa'alelei le mafutaga a le tagata agasala ma le Atua, na malepe ona o le agasala.

Le Paia e, o le Ekalesia, aemaise le aufaitau Sulu, lea foi ua fa'ataumua ava lo tatou sa, i la tatou malaga i lenei tausaga 2019. O le Vala'au lea a le Matai mo oe le Ekalesia... Ia tatou Galulue e atia'e ma saili manuia, auā fanau ma aiga, le nu'u, le Malo, aemaise lau tautua toto i le Galuega Paia a le Atua.

Le upu moni ua maualuga le tamaoaiga o le Ekalesia, ua savali i luma ana atina'e, ua atamamai au tamafanau i le poto salalau. Mai fea? O lau tautua tuavae, i au Faiga Taulaga i so'o ala, o lou

Alofa tulai i le Au-Faigaluega Paia a le Atua, aemaise o lau Tatalo mo Samoa ma lona Malo. Malo Fa'afetai le galulue mo mea lelei, ia pale pea le Atua, i le mamalu ma le viiga.

Ua vala'au le Matai, ia tatou tutu, ma galulue fa'atasi mo se Ekalesia manuia. Fai mai le upu a le isi tama ole Ekalesia... “*THE CHURCH IS THE CONTINUATION, OF THE INCARNATION OF JESUS CHRIST.*” Oe le Ekalesia, o lou fa'alupega ‘O oe o le TINO O KERISO i le lalolagi’ ‘*YOU ARE THE BODY OF CHRIST*’. O lona uiga o lo tatou vala'auina lea mai le Matai, tatou te galulue e fa'aauau le Galuega Fa'aola a Keriso i le Lalolagi. E le gata ole tino ma le mafaufau, ao le ola fa'ale-agaga ia maopo ma lelei. E le mafai ese to'atasi po'o se to'alua. Ae mafai ina ua tatou u'ulima, galulue, ma mulumulu aufoe fa'atasi i le Alofa. Ae aua nei galo saunoaga ale Ali'i... “*AUA ELE MAFAIA E OUTOU ONA FAI O SE MEA E TASI, PE A A'U LE I AI*” O lona uiga e tu'ufa'atasi lo tatou vaivai, ae fa'aatoa e le Matai.

**IA MANUIA LE TAUSAGA FOU**

Saunia:

**Keneti Leaupepetele. T. (FS.)  
EFKS Savaia & Tafagamanu  
– Uta.**

**Matagaluega: Aana**

\*\*\*\*\*

---

# O Tagata na Latou Foaina ma Faafailele le Ekalesia **PETERU**

*faaauau mai ia Tesema 2018*

e le'i mafua ona o sona le malamalama, poo le fefe, a o le fememea'i. E iai ni mea na tutupu e faamaonia ai lea mea.

## **Ua Savali Peteru i le Vai**

O loo faamauina e le Evagelia a Mataio se mea uiga ese na tupu. (14:22-36) Na o i le vaa le au soo i le Sami o Kalilaia, ae nofo Iesu mo se taimi e tatalo ai. Ae pei lava ona tula'i soo mai i ni ogasami tetele e puipuia e le laueleele, na te'i ua agi malosi le matagi, ma felafoa'ia ai le vaa ma le au soo. E ui lava o Peteru ma isi o le au soo ua masani ma uiga ia o le Sami o Kalilaia, ae ua fai lava si malosi o le matagi. O le pogisa o lea taimi na latou iloa atu ai Iesu o savali mai i le vai e aunoa ma sona afaina i le matagi ma le sousou o le sami. Na muamua lava ona manatu le au soo o se aitua. I le manatu o le ausoo, ua matua faaletonu le tulaga o le mea o latou iai. E le gata o le pogisa, a ua iai ma aitua. Ona valaau ai lea o Iesu i le au soo e aua le fefefe.

Ona fai ai lea o se talosaga uiga ese a Peteru. "Le Alii e, afai o oe, ia e fetalai mai ou te savali atu i le vai." Ona fetalai lea o Iesu, "Ina sau ia!"

I sina taimi puupuu lava i le amataga, na fai ai e Peteru e pei ona fai e Iesu, ua savali i le vai i le taimi o le afa. Ae le'i umi ae fefe i le matagi ma le sou o le vasa ona le vaai ai lea i le Alii a ua vaai popole i le louloua o le sami. A o amata ona goto ifo Peteru i le sami, ae 'a'apa atu Iesu ma lavea'i ma toso mai o ia i luga.

E ui lava e le o se faata'ita'iga taua lea ma le atoatoa o le

faatuatua, ae o le faailoga lava lea o le loto tele. E ui lava e na o ni nai sekone na tupu ai lenei mea, a ua faaalua ai lava i nai ia sekone, mo Peteru lava ia, e mafai ona fesoasoani mai Iesu, ma mafai ai ona faataunuu lona manao, ia savali atu i luga o le sami.

## **Ua Mulumulu e Iesu Vae o Peteru**

I lea lava aso aupito faigata ia Iesu, i itulau ia i luma mai o lona faalataina, ma pu'e, sauaina, ma faasala i le oti, na ia faapotopoto ai lona ausoo i le afeafe aupitoaluga ma ia amataina ai le Talisuaga a le Alii. Na ia faia ai foi se mea na tete'i ai le ausoo, aemaise lava Peteru, ua ia mulumuluina vae o ona soo. (Ioane 13: 5-11)

Ia tatou o soifua ma ola i le senituri lenei e 21, e pei e le taua tele lou mulumulu o vae o le isi tagata; ae i ona po o Iesu, o se mea matua leaga lea mea. E ui lava o le masani i na ona po le saunia o se apa fafano mo malo poo e e ulu atu i le fale, e mulumulu ai o latou vae, ae le o se mea sa masani ona faia e tagata o le aiga poo se isi fo'i. E oo lava foi i pologa poo tavini Iutaia latou te le faia. A o lea ua faia e Iesu!

O se mea e matua le fetai i le vaai a Peteru; lona vaai atu ia Iesu ua tootuli ifo, ma le 'apa vai i ona tafatafa, ma le solo i ona lima, ma amata ona mulumulu o latou vae. Ai se ofo o tagata o le nuu pe afai na salalau atu ni tala o lenei mea ua faia e le tagata e igoa ia Iesu! Ona tautala ai lea o Peteru, "E te le mulumuluina o'u vae!" Na vave lava le tali a Iesu, "Afai ou te le mulumuluina ou vae, e leai sou

vaega faatasi ma au."

Ae na vave foi ona sui le manatu o Peteru, "Ia le Alii e, ia mulumulu la e le gata i o'u vae, ae o o'u lima ma lo'u ulu."

## **E Umi le Lisi**

Mataio 16:21-23 o loo faamauina ai le faasa'oga ma'ati'ati o Peteru. O le taimi lea sa a'oa'oina ai e Iesu lona ausoo e uiga i ona puapuaga ma lona oti i Ieruselema, ma lona toe tu mai le oti. Ua mafaufau nei Peteru e uiga i le oti o Iesu, ona ia alaga ai lea, "E ui lava ina tausuai o tagata uma ona o oe, ou te le tausuai lava a'u." E leai ma se manatu o Peteru e mafai ona oo ni mea faapea ia Iesu. Fetalai Iesu, "E moni, ou te fai atu ia te oe, o lenei lava po, a o le'i vivini moa, e te faafiti faatolu mai ai ia te au." Toe tali foi Peteru, "E ui ina ta oti lava faatasi ma oe ou te le faafiti lava ia te oe."

E faigata ona tatou malamalama i le faigata o mafatiaga o luluti i le agaga o le Alii. O le tali a le Alii e ma'ama'ai lava. "Alu ese ia ma o'u tua, Satani e, aua e te le o mafaufau i mea tau le Atua, a o tagata."

E iai isi mea na fai e Peteru e toe faanoanoa ai lava ia mulumulu ane, aemaise lana folafolaga na te le'i mafai ona tausui. I le afeafe aupitoaluga lea na mulumulu ai e Iesu vae o ona soo, na fai ai le felafolafoa'iga a Iesu ma Peteru e le toe mafai ona galo ia Peteru i lona olaga atoa:

Mataio 26:31-35: Ona fetalai atu ai lea o Iesu ia te i latou, "E tausuai outou uma ona o a'u i lenei lava po, aua ua tusia, "Ou te taia le leoleo mamoe, ona ta'ape'ape ai lea o le lafu mamoe. Ae a mavae lo'u toe tu, ona ou muamua atu ai lea ia te outou i Kalilaia." Ona tali mai ai lea o Peteru ia te ia, "E ui lava ina tausuai o tagata uma ona o oe, ou te le tausuai lava au.." Ona fetalai atu ai lea o Iesu ia te ia, "E moni, ou te fai atu ia te oe, o lenei lava po, a o le'i vivini moa, e te

---

# O Tagata na Latou Foaina ma Faafailele le Ekalesia **PETERU**

faafiti faatolu mai ai ia te a'u." Ona fai mai ai lea o Peteru ia te ia, "E ui ina ta oti lava faatasi ma oe, ou te le faafiti lava ia te oe."

Ona oo ai lea i le itula na pu'eina ai Iesu. O se vaega e toatele na o atu - o fitafita Roma, leoleo o le malumalu, ta'ita'i o le lotu, ma a latou auauna e fia selau. I luma o lenei motu o tagata, o savali ai Iuta le Sekala.

O lona fia puipuia o Iesu na ala ai ona se'i le pelu a Peteru ma ta ai le ulu o se auauna ma motu ai lona taliga. A o le'i tula'i mai se vevesi, ae taofi e Iesu Peteru e aua le toe faia. Ona ia faamalolo ai lea o le taliga o le auauna. Ona tuua faatasi ai lea o lea mea e Iesu ma e na o mai e pu'eina atu o ia, a ua mulimuli mamao atu ona soo.

Ua ta'ita'iina atu o ia i le fale o Kaiafa le ositaulaga sili, lea sa potopoto ai le au tusiupu ma toeaina. A o Peteru ua ulufale faatasi ma auauna i totonu o le maota ma faalogologo ai i le faamasinoga o Iesu. Na ui ane se auauna teine ma na iloa atu Peteru ona ia fai atu lea, "Sa e iai faatasi ma Iesu le Kalilaia." Ae fai mai Peteru, "Ou te le iloa lena mea e te fai mai ai." Sau foi le isi teine ma fai mai, "Na ou vaai foi ia ia lea o faatasi ma Iesu le Nasareta." Ae tali Peteru, "Ou te le iloa lenei tagata."

Matua eseese mamao lea itula ma le taimi na fai ane ai Peteru, o Iesu Keriso o le Alo o le Atua soifua. A o lenei ua ia faaoga le gagana taatele ma le le faaaloalo ma ia ta'u Iesu o - "lenei tagata.", a ua le ta'ua o le "Alo o le Atua Soifua".

Ona o ane foi lea o nisi sa tutu ma matamata mai, ua faapea ane, "E moni o oe lava o lo latou, aua ua iloa oe i lau gagana." Ona augani ai lea o ia ma tauto, ua faapea atu, "Ou te le iloa lava lea tagata." Ona vivini loa lea o moa. Ona manatua lea e Peteru o le upu na fetalai atu ai Iesu ia te ia, "E le vivini moa seia e faafiti faatolu mai ia te au." Ona sola ai lea o Peteru ma tagi lotulotu. (Mataio 26:69-75)

Ua pala'ai ea Peteru? Atonu. A ia manatua na se'i le pelu a Peteru ma sauniuni e faafetaia'i le motu o tagata. E le taumate o iai se isi mea o tupu ia Peteru. Ua masofasofa mea o talitonu iai Peteru. Na na le mafai ona lavea'i Iesu i le faato'aga; o lea ua saisai lona Alii ma sauaina. Ua matua nutililii talitonuga o Peteru. Ma a na o se isi foi tagata, o le mea lava lea e tasi e tula'i mai.

Ma e le toe galo ia Peteru lenei mea. Ua faafaileleina e lenei mea lona tagata, ma avea ai o ia o le ta'ita'i aupito sili ona logologoa o le Ekalesia.

Ae na o le laasaga muamua lea.

## **Mai le Pogisa i le Malamalama**

O loo faamaumauina e le Feagaiga Fou le faasefulu ma le lua ona faaali mai o le Alii i lona toe tu mai. Na faaali i fafine iloga e pei o Maria le Makatala, faaali i le ausoo i le afeafe aupitoaluga; faaali foi i le tusa ma le lima selau tagata i luga o le mea maupu'epu'e i Kalilaia

I le tusi a Paulo i Korinito, o loo faamauina ai, "Na iloa foi o ia e Kefa" (1 Korinito 15:5). *Kefa* - o le faa-Aramaika lea o le igoa

Peteru ma o le igoa lea na faaigoa ai e Iesu ia Peteru.

E leai ni faamaumauga se tele e uiga i lea feiloa'iga, na o le faailoa mai o le mea na tupu. O le feiloaiga i le va o le Alii ma le na faalataina o ia. E le o faailoa maia foi ni tala na fai. A o le mea moni, o le a lava ni saunoaga a le Alii na fai, na toe faafouina ai le faatuatua o Peteru, ma toe faaolaola teteleina ai lana misiona.

O le masina na sosoo ai, o le liliigiina ifo o le Agaga Paia i luga o le ausoo ma isi na mulimuli ia Iesu. E talitonu le au popoto o le aso fanau lea o le Ekalesia. A o le'i oo i le aso lea i Ierusalem, e le'i iloga mai le iai o se Ekalesia, ua na o ni soo fefevavale ma tagata pe to'a 120 o mulimuli ia te ia, o loo maua i le mata'u ne'i oo foi ia i latou puapuaga ua oo i lo latou Alii.

Ua laugaina e Peteru, le tagata na le mau tali i fesili a se teine tavini, se mataupu o loo fetalai'i pea e matagi i le faalogo a tagata i ia tausaga e fia afe ua mavae, Na valaau ai Peteru i le fia afe o tagata na auai i lea aso Penetekoso, ina ia liliu ma faatuatua ia Iesu Keriso. E le gata ina faamanino lelei e Peteru i lea lauga le toetu mai o Iesu nai e ua oti, ae na iloa ai foi le agavaa o Peteru e avea ma ta'ita'i. Ua avea le tagata osovale ma fia matamuamua na tatu'i i fesili a le teine tavini ma faia'ina ai, a o lea ua tula'i mai o le siamupini e leai se fefe ma se toe tepa i tua. O le lauga 'ano'anoa na sii ai i luga e Peteru lona Alii o Iesu Keriso, ae le gata i lea, o lona faataatia i luma o ta'ita'i o le lotu Iutaia le mea moni, o latou, ma ta'ita'i faale-malo o Roma, atoa ma i latou uma na alalaga "Faasatauro ia! Faasatauro ia! na mafua ai ona faasala i le oti le Alii.

E le'i toe mafai e se isi ona taofiofia Peteru i lea aso, poo i se isi aso mulimuli ane. O le motu o tagata na amata i le na o le 120 tagata, e oo ane i le faaiuga, ua atoa le tolu afe.

# O Tagata na Latou Foaina ma Faafailele le Ekalesia **PETERU**

*mai le itulau e 5*

## **Fesuia'iga o le Galuega-Faamasani i le Alofa i Tagata o Nuuese**

Na ta'ita'i e Peteru le Ekalesia i Ierusalem faapea ma lona faasalalauina atu mo tausaga e tele. Sa fetuutuuna'i foi lona mafaufau i ona talitonuga ma faiga. O tagata Iutaia o ia aso e matua leai so latou manatu mamafa i Tagata o Nuuese. Na mana'omia ai se faaaliga mai le Atua e mafai ai ona talia e Peteru Tagata o Nuuese e avea ma Kerisiano. (Galuega 10:1-33). Ae na gaua'i Peteru i le talitonuga fou.

Ina ua te'a ni tausaga se tele o ta'ita'i i le Ekalesia i Ierusalem,

ona valaauina ai lea o Peteru e tuua Ierusalem ae amata le misiona mo Tagata o Nuuese. E talitonu le toatele o Paulo na mua'i momolia le Tala Lelei ia Iesu Keriso i Tagata o Nuuese, peitai o Peteru o ia lea na ia muai faataatia le alavaa o le Tala Lelei mo Nuuese. E oo ane i le taimi na avea ai ma vaega autu o le galuega a Paulo ia Nuuese, a ua leva ona lauga Peteru i Nuuese.

*mai le tusi:*

### **60 People Who Shaped the Church"**

tusia e Alton Gansky  
faamatalaina e  
Afemata T. Apelu Aiavao

faatuatua. Pei o le Soo o Peteru, na tautino ia Iesu ta te oti faatasi, peitai ina ua taitai Iesu e faamasino, a ua taulafilafi solo ma faafitauli le Alii – Ou te le iloa lava lena tagata o Iesu.

O le fanau a Sepetaio, o Iakopo ma Ioane, o So'o ua naunau i le fiasili ma fia avea ma tagata muamua, ae a faapefea isi ona uso a So'o? O le So'o o Toma loto masalosalo, ta'u atu e isi so'o ua latou iloa Iesu ua toe tu mai o ia, ae tali mai seiloga e tago i a'ao o Iesu sa tutui i fao ona faatoa talitonu lea. Le so'o o Iuta, e tuinanau i mea a le lalolagi ma ana upu faitio i le maumau o le suau'u manogi sa u'u ai vae o Iesu, ana faatau semanu e tele se tupe e maua ai ma ave ai mo tagata matitiva. A'o le tali a le Alii, tu'u pea le mea taua ua ia faia, o le faataimuaga o lona tanuga, o fea lava o le lalolagi e oo iai leni tala. E tautaua ai lona igoa i le Mea Sili, ua ia faia mo lona Alii. Ao le taunuuga foi o leni So'o faalata, na malaia ma fano o ia. Popolega ia o le au So'o, ma foliga ua tuufesili i o latou loto, pe aisea lava na filifili ai i latou e lea Alii, ao lea o le a alu ese? O Ia sa faamoemoe i ai la latou galuega, ma le tele o Vavega na ia faia. Nisi foi ua manatu, sili ona toe foi i o latou aiga, ua maumau le taimi na mulimuli ai i le Alii.

O faafitauli ia, sa matua fetalai ai Iesu, Ia le tuua Ierusalem, sei outou maua le Agaga Paia. O le Mana ma le Malosi lilo mai le Atua, e tapena maeaea ma faafou ai lo latou malosi i le tino, le mafaufau aemaise o latou ola galulue i la le Agaga. O lona uiga lea lava ua atoatoa le tapenaga a le Alii, i la latou mafutaga. E lei tuua faaleiloga, pe tuua foi ia tama. Ao lea lava na taulaluga la latou

## **PEPA O LE FONO TELE 2018**

**14 – 25 ME 2018**

### **AUTU O LE FONO TELE -**

#### **“O LE AGAGA O LE ATAMAI I GAGANA”**

#### **1. TAPENAPENA MO LE AFIO MAI O LE AGAGA PAIA, O LE AGAGA O LE ATAMAI I GAGANA.**

Ai lava ua masani ona ave le faataua o leni vaitau o le Afio o le Agaga Paia, e fai ma Autu o Fono Tele taitasi i lea tausaga ma lea tausaga. Se'i faatamaoia ma faatutumuina ai le mamalu o le Ekalesia Aoa i meaalofa eseese o le Agaga Paia, e le gata i le tino, ae sili i le Agaga. Pei foi la o leni Tausaga 2018, ua faataua ai le Agaga o le Atamai i Gagana. Agaga o le Poto ma le Atamai i le tagata e tautala ma molimau ai. Sei toe foi lava i tua se

faamatalaga, ina ua mavae le Toe Tu o le Alii. Ua silafia e Iesu, ua oo mai le taimi e tetea ai ma ona So'o, a'o le a afio o Ia i le Lagi. Peita'i – E i ai itu taua o loo silafia e Iesu e tataua ona mataala, tapena ma saunia i ai ona soo galulue. Ai lava o le naunautaiga lea o le Alii Toe Tu o Keriso, ina ia 'aua lava nei o ese ma Ierusalem, sei afio ifo le Agaga Paia i o latou luga. Na te faatutumuina ona soo galulue i le Alii o Keriso, vaivaiga o ona soo galulue. E fia lelei ma fia matamuamua pe a latou fesagai ma mafuta faatasi, ae tumu i le lotovaivai, fefevavale, ola masalosalo ma le itiiti o lo latou

mafutaga i le oa sili mai le lagi, faatamaoaiga ai le aufaigaluega gaogao'i'i ma le faatauvaa.

## **2. O LE AFIO IFO O LE AGAGAPAIA - O LE AGAGA O LE ATAMAI I GAGANA.**

O le Aso Penetekoso – O le Aso na afio ifo ai le Agaga Paia i luga o tagata uma lava. Upu Penetekoso – O le lima sefulu aso, poo le fitu Vaiaso mai le va o le Pasefika mulimuli a Iesu ma ona so'o, seia oo mai i le Aso e faamanatu ai le tasi o sauniga taua faa-Iutaia. O le Seleselegasaito. E faafetai ai i le Atua i fua o a latou faatoaga, ma le latou talitonuga, o le Atua lava, ua latou selesele ai i manuia o le laueleele. O ulua'i fua foi o a latou faatoaga, latou te ofoina atu e faitaulaga ai i le Atua. Le ala lea e taua ai i soo se Iutaia lava, poo fea lava e aumau ai tafa eseese o le lalolagi, e fia oo lava i Ierusalem, e auai i le sauniga o le Aso o le Seleselega.

O le Afio ifo o le Agaga Paia i luga o tagata, na liligi ifo ai meaalofa eseese mo tagata uma, e iai le perofetaga, toeaiina fai Miti, o e fai Vavega ma faailoga, e faapea foi i le Agaga o le atamai i gagana. A'o le itu taua foi lea e tuufesili ai le mafaufau- Pe faapefea ona tatou iloa le tagata, ua i ai le Agaga o le atamai i gagana; O le a le mea tatou te mautinoa ai?

A toe tagai i mea sa tutupu i le Aso Penetekoso, Ua taalili mai le lagi, peiseai o le matagi ua agi tele mai. Ua iloa atu o laulaufaiva e pei o se afi ua vaevaeina. Pei o le tiute taua lea ole laulaufaiva, o le gagana mai, ta'u mai, ma faailoa mai le feau taua o le Tala Lelei o le lagi. O le Feau ua auina mai e le Agaga Paia i luga o le au so'o, aposetolo ma e faatuatua uma sa i le aso. O lona uiga o le Agaga o le Atamai i gagana e iloa i le molimau

o le Tala Lelei o le Malo o le Atua. E iloa foi le Agaga o le Atamai i uiga ma amioga faale-Atua, ma o i latou uma foi, e fai ma molimau i le Tala Lelei o le Malo o le lagi, e i ai le Agaga o le Atamai ia te i latou.

Ai lava ana o se feau e ese mai i le Tala Lelei, e atagia ai le fiasili, ma le fiapule, ailoga a gagana le laulaufaiva, ma e gugu foi le gutu e le tautala. E le fia molimau foi, e avefeau o le Tala Lelei. Ma e le mafai foi ona ta'ua, o se Agaga atamai i gagana. Ae o le a taua, o le Agaga fiafaumalo, fiasili ma le faamaualuga, e pei ona tatou vaaia i nei aso i le tumutumu o faamasinoga. Ua afua ai le feaina'i, fevaevaea'i ma le maua ai se toafilemu i o tatou aiga, nuu atunuu male galuega pele a le Ekalesia.

O le agaga atamai i gagana, o le isi lea faataitaiga mai le Aposetolo lauiloa i Nuu Ese o Paulo. Pei lava ona ia tautino ma tautalatala i le Ekalesia i Korinito "*O se ua ia Keriso o le tagata fou ia. Faauta ua mavae mea tuai, ma le olataga tuai, a ua oo mai le Ola fou.*"

Aua a toe tepa i tua i le olaga tuai a'o igoa ia Saulo, o ia o se Iutaia o le ituaiga o Peniamina. E aiga faatasi ai male tupu o Saulo. O se tagata lava ina faamaualuga, fia sili ma le lē fia toilalo. O le faiaoga o le tulafono o tapuaiga faa-Iutaia. Mafutaga lea o lona sauaina o le au Kerisiano ina ia aua nei faaluaina le lotu Iutaia i se isi talitonuga e ese mai. Poo fea lava e faalogo ai Saulo i le mea o iai le Au Kerisiano, e le toe faatali. Tuli ma tuliloa. E pei foi ona alu i le ala i Tamaseko, e tapue le Au Kerisino saisai ma Lafoai i le falepuipi. O le tagata ua iai le Agaga fia sili ma le faamaualuga. Ua tautala foi le laulaufaiva i upu soonafai ma le fia toa e le fia

toilalo. Ae talofa, ua le tau lau o lona maelega ma lona faamoemoe soonafai, ina ua taia o ia e le pupula malosi o le Alii, ma pa'u ai i lalo o le eleele. Ua tauaso ma ua leiloa se mea.

Ioe, e tulaga ese taimi ma ituaso o le Alii. Poo le a le fia maemae o le malosi, poto male atamai faaletagata. E alu lava ma le faalologo ma le usiusitai i le faasinoga ma le ta'ita'iga a le Pule Aoa o Keriso. O ituaso ua lagona ifo le salamo. Ua sola le malosi, ua mavae le faafiapoto ma le faafiaatamai o le tagata. A ua augani ma tatalo i le Alii, le Alii e, se a ea se mea e te finagalo iai oute faia? O le tagata ua lafoai atoa le ola, e pule ai le Alii o Keriso. Faitalia le Alii i le faaaogaina o lona tagata. E pei ona fetalai le Matai e ana le galuega – Paulo, o oe o le Vaa ma le ipu e te molimoli lo'u Igoa i nuu ese. Le Auauna ua Faafou e le Agaga o le Alii o Iesu. Ua tuuese le faamaualuga. O le agaga leaga o le fiasili ma le mitavale. A ua toto i le lotu le Agaga o le Atamai, e gagana ma molimau ai i le Tala Lelei o le Faalataga, pei lava ona ia tautino, o se ua ia Keriso, o le tagata fou ia. Faauta ua mavae mea tuai, a ua oo mai le Ola Fou.

O se galuega o le tele o faafitauli, o faigata, puapuaga i ana malaga faamaisionare. Faafia ona molia ma faamasino e toeaina o le lotu Iutaia, ma ositaulaga, aemaise o fonotaga a nuu. Ua saisai ma lafoa'i i Falepuipi, aemaise foi o le lē fefe e molimau le Tala Lelei i tupu ma ta'ita'i o Malo, pei o Emeperoa o le Malo o Roma.

O lona naunautaiga lea, ia oo lava le molimau i Roma, auā sa pulea e Roma le lalolagi i na ona po. O le o'o i Roma o le Tala Lelei o le lalolagi lava lea. E le fefe e molimau atu i Tupu ma Taitai o

Malo ma Atunuu. O Alii Sili ma faipule ma le lalolagi uma. Lea lava sa maliu faa-Maturo ai le Aposetolo i lima sau o Nero, o se tasi o ta'ita'i o Roma sa fai le Au Kerisiano ma ona fili, taumafai e tape le tupu a'e ole talitonuga faakerisiano, peitai e le mafai ona o le Agaga o le Atamai o le Alii Toe Tu. Na atia'e ma faatuina ai le ulua'i Ekalesia a le Atua, e le mafai e se malosi faalelalolagi ona talepe pe soloiesea, ae tupu ma ola pea lava pea e oo i le faavavau. Mafua i se a? O le Ekalesia e faavae i le Agaga o le atamai o le Atua. Molimau ole Atua na faaalua ai lona Alofa Tunoa i luga o le satauro, Lona maliu ma lona Toe Tu Manumalo mai. A lea ua fai ma molimau a le Ekalesia. Le Tala Lelei o le Faolataga, e ala ia Iesu Keriso.

### **3. AGAGA O LE ATAMAI I GAGANA IE GELANIMA LE PASEFIKA.**

Fetalaiga a Iesu i ona soo, Aposetolo ma le Au Faatuatua uma, mulimuli ane, ia outou o e fai nuu uma lava ma so'o, papatiso atu i le Suafa o le Tama, le Alo ma le Agaga Paia.

O le Agaga o le atamai sa gagana ai So'o i le feau lava lea e tasi. Molimau ai foi Aposetolo, ma atia'e ai le Ulua'i Ekalesia e le Agaga Paia. O le Feau lava lea e tasi – Tala Lelei o le Malo o le lagi. Sa afua ai ona faatuina ma faaosofia ai le Sosaiete a Lonetona Misionare ma fai ai la latou tonu, e omai i le Pasefika, e tala'i mai ai le Tala Lelei lea o le Malo o le Lagi. Fai mai la latou tala, E lelei laueleele o le Pasefika, e valevalenoa, e faaleai ni a latou feau e faia. E maua mai lava le Toeaina o tutu i lalo o le paolo o le nuu, ma le loomatua, o loo tae lauulu i lalo o le ulu, atonu e faigofie ona aoao atu i ai le Tala Lelei. Pei

ua iloa foi e papalagi a tatou foi polokalame i lea aso ma lea aso, a uma lava gasegase o le taeao ma taumfataga, ona fai lea o se koma, a oo i le paolo o le afiafi ona gasolo atu lea o tamaiti ma tupulaga e fai a latou tultuliga i ma latou taufetuliga, ae taualuga i a latou i ga ve'a i le po masina. Ai o faamalosito ia a le fanau, o loo faapea mai ai papalagi, e faaleai ni a tatou feau.

O le isi itu taua, e tatau ona silafia i faiga a Misionare, o le manatu i faiga faa-Kolone, e vaai maualalo ai i lenei itulagi o le Pasefika, pe a fua atu i isi atunuu tetele pei o Initia ma atunuu Mosalemi, atoa ai Saina ma Iapani, aisea na le o iai? Poo le manatu e malolosi atunuu tetele e faigofie ai ona faaumatia i latou ma la latou feau talai? Peitai, e ui lava i lea, na fai la latou tonu ma malaga mai ai i Tahiti, agai mai i Toga, ma fuafua mai ai le malaga a le Misionare o Ioane Viliamu ma lona faletua ma la latou faigamalaga. Taunuu mai i Samoa ma talia aloaia ai e Malietoa le Tala Lelei na taunuu i Sapapalii. O nei faigalamaga i le fita o ala ma le matamataita o le vasaloloa, pe a leaga le tau, ma oo mai matagi ma afatia ai i afa; ole upu moni lava e taumate pe tua i ni a, pe taunuu foi, pe lagomau i le vasa o le tuumagau le elia. Peitai o le taunuu i laueleele o le Pasefika ma atunuu na atofaina aemaise si o tatou atunuu o Samoa. Na pupula ma faaalua mai iai Vavega ofoofogian na saunia e le Mana lilo o le Agaga Paia, aemaise o le Atamai o le Gagana sa fesootai ai Misionare ma atunuu eseese o le Pasefika mo le Talaiina o le tala Lelei ia Iesu Keriso.

Ina ua ola ma tupu le Tala Lelei i Samoa ma a'oa'o e Ioane Viliamu nisi o a'oa'o e fai ma

Faifeau Misionare e faatalalelei ai atumotu ole Pasefika – mai le 1839 – 1979. O le molimau a le tama ia Oka Fauolo ma faapea ai O se Galuega o le loimata maligi ma le toto masaa, i nisi o atunuu faapaupau ma le 'ai tagata. E pei o ni amio a manu, ma o latou uiga e pei e le oni tagata ola. O le faataitaiga lea na maliu faamaturu ai Ioane i Eromaga. Pei foi na taua i le faamatagala a le Faifeau o Lolagi ma isi e toalua, ina ua taunuu atu i le motu o TANA i le malaga faamisiona muamua a Faifeau Samoa ma Ioane Viliamu, tausaga 1839. Ina ua tulaueleele i TANA ua toe tu'umuli le Savali o le Filemu. Ae feosofi ane tagata ma lomilomi o latou tino ma faapea mai "UFO Naroli Kamasi". Matua momosi ma aulelei o latou tino i le 'ai. Ai lava o le alofa o le Atua ma nai upu sa tau nanunanu atu ai, sa fai lea ma laveaina i ai latou. E moni e le faigofie, e faigata ma atili ai ona faigata, aemaise o le faigata o gagana eseese sa o latou molimau ai, a'o le faalagolago ma le mautinoa i le agaga o le Atua e maua ai so latou iloa ma se atamai, e faatino ai la latou galuega molimau i Nuu Ese.

Pei o le isi lea faafitauli tele sa feagai ma o tatou Tuua Misionare, O le gagana, e talai atu ai le Tala Lelei ina ia malamalama ai tagata. Ao se tala fiafia, sa mafai lava e nai o tatou Misionare ona lauga ma faatino a latou galuega i gagana eseese a Atunuu sa galulue ai. Ua le o se poto ma se atamai o le tagata, ao le fesoasoani mai ole agaga atamai o le Atua mo le tatou galuega Folafola o le Tala Lelei. Ou te manatu e lei soona filifilia e Tuua ua tofafa mai Tia lenei Vaitau e toe aofaga potopoto mai ai le Ekalesia e toe faafou ma faatamaoiga i meaalofo eseese, aemaise o le



Agaga atamai i le tagata e molimau ma gagana atu ai i le Tala Lelei o le Faaolataga a le Atua Ekalesia, o lau molimau lava i le Agaga Atamai o le Atua, e toamalie ma saogalemu ai le galuega a le Atua.

Ua tele faafitauli ma faigata, ua fesagai ma le Ekalesia i nei aso, e le gata i fafo atu, ole lio o le Ekalesia e pei ona iai le Mataupu ole Lafoga, o galuega mamafa e fai i le Aso Sa. A ua

leai se leo o Ekalesia, ae faapea foi i le lotoifale o le Ekalesia i Galeuga faale-Matagaluega ma Pulega, e oo foi i Ekalesia i Nuu ma alalafaga taitasi.

O le a sou finagalo?

Ia manuai le Fono Tele o lenei Tausaga 2018.

**Saunia:Fili Matalavea (FT)  
EFKS Falela  
Matagaluega Malua.**

iii. Le Kerisiano ma lona aiga (3:18-21)

iv. Le Kerisiano ma ana galuega (3:22-4:1)

v. Le Kerisiano ma tagata ese (4:2-6)

E foliga mai, o le mea e pito i sili ona taua i le ola o le Kerisiano, o le faatumauiina o lona va feagai ai ma Keriso i taimi uma. A le faamalieina le va feagai o le tagata ma Keriso, o le a faapea foi ona afaina ai isi feso'otaiga uma a le tagata ma isi vaega o le olaga. Ma o le mafua'aga lea o le faataoto manino o le aposetolo o faatonuga malolosi e fa (4) e limata'ita'iina ai le ola o le Kerisiano:

1. Ia outou **saili** i mea o i luga
2. Ia outou **loto lava** i mea o i luga...
3. Ia outou **fasiotia** o outou itutino o i le lalolagi...
4. Ao ona po nei ia **tuu ese** ai e outou lava o nei mea uma...

### **O LE KERISIANO MA KERISO – 3:1-8**

#### **1. Saili i mea o i luga (3:1)**

O le faatonuga amata lenei ina ia saili i mea o i luga o iai Keriso', o loo faavae i luga o le talitonuga maumaututu, o le Kerisiano ua faapea ona faatuina faatasi ma Keriso'. O le talitonuga lenei o oo faapea ona faamatala manino ai le uiga o le aveva o le Kerisiano ma tagata talitonu faamaoni, 'ua faaolaina mai le oti'. O lona uiga, ua faapea ona mautinoa le fesootaiga o le tagata Kerisiano male Alii toetu o loo i le itu taumatau o le Atua. O le fesootaiga lea ua faapea ona sili ai

## **MAFUTAGA MATAGALUEGA APIA**

**25/07/2018**

le faamamamfa a le aposetolo i le autu, ona o le a'oa'oga sesē ua aliali mai i totonu lava o le Ekalesia e faapea, e lē lava le maliu ma le toetu o Keriso e faaolaina ai le tagata faatuatua. I lo latou manatu. E i ai mea e tataua ona faaapoopoo i le maliu ma le toetu o Iesu Keriso, ina ia mautinoa ai le faaolaina o se tagata. O le mata'utia o nei a'oa'oga sesē, ona o le manatu o Iesu ua na o se isi atua o le vanimonimo, e i le laina o atua e tapuai faasolosolo ai le tagata se ia oo i le Atua, ona maua lea o le faaolataga. O lona uiga, ua le lava Keriso o loo faamauina i le mataupu 1:15-20. O loo molimauina ai na faia e Keriso mea uma lava, na faia foi mo ia. Ua faaleleia foi mea uma i le lagi ma le lalolagi i le toto o lona satauro. O lea ua nofo silafia le Mafutaga i le atoaga o ia a'oa'oga sesē, e pei ona atagia i le mataupu 2 ua maea ona talanoaina. E ui o loo atagia foi ia a'oa'oga sesē i le mataupu e

3, peita'i ole a agai se manatu i le mataupu e 3.

#### **KOLOSE 3: 1-25**

O le mataupu lenei e 3:1 seia oo atu i le mataupu e 4:6, ua faataoto ai e le aposetolo lana feua faamafanafana i le ekalesia i Kolose, ae maise o le ola e ao ona ola ai le kerisiano a o feagai ai male olaga i aso fai soo. O le faamoemoe o le aposetolo, ia le gata ina iloa le talalelei ia Iesu Keriso male alofa o le Atua, a ia ola ai ma le faatuatua. Peita'i e le mafai ona ola ai le tagata i lea talalelei, pe a fai e le iloa le uiga loloto o le aveva ma tagata fou ia Iesu Keriso. Ua faapea ai ona faatulagaina e le aposetolo ni vaega se lima (5) o a'oa'oga taua e faatatau i ala e faatonutonu ai e le pule a Keriso le ola o le kerisiano i vaipanoa eseese o lona ola o le vaevaega lenei o ia a'oa'oga:

- i. Le Kerisiano ma Keriso (3:1-8)
- ii. Le Kerisiano male ekalesia (3:9-17)

ma le atoatoa le Kerisiano ina ia faatupuina ma faamautuina. O le talitonuga masani lava ua na o le tagata le talitonu e faapea ona ola lē saili. Peita'i i a'oa'oga a le Tusi Paia, o loo manino ai e lē saili le tagata i le Atua, a o le Atua ua saili mai ina ia maua ma faaolaina le tagata agasala. A faapea foi ona saili le tagata i le faamagaloga a le Atua, o loo talitonuina lava oloo mafua lea sailiga ona o le Atua ua faaosofiaina e ala i le faatuatua. O le uiga lea o le Keriso o loo tietie i le itu taumatau o le Atua. O le Atua o loo saili mai pea i taimi uma ole ola e ala i lana ta'ita'iga mamana ma lana pule faatupu i mea uma ma tagata uma.

## **2. Loto atu i mea o i luga (3:2-4)**

O le faatonuga lona lua lenei, ia 'loto atu' i mea o i luga, ae le o mea i le lalolagi. O le faafouina lava lea o le mafaufau ina ia iloa lelei le uiga o mea uma, ma iloa lelei ai le eseese o mea e uiga ia Keriso mai mea leaga o lenei olaga. O le Kerisiano i le talitonuga o le aposetolo, ua oti faatasi ma Keriso i le agasala ma ua lilo ai le ola faatasi ma Keriso i le Atua. A faaali mai la Keriso i lona mamalu ona iloa ai lea o le Kerisiano faatasi ma ia.

## **3. Fasiotia o outou itutino o i le lalolagi (3:5-6)**

O le faatonuga lona tolu lenei o loo aliali manino ai le faamoemoe o le aposetolo ina ia faapaiaina le ola o le Kerisiano ua faatuatua ma talia le Alii. Ole ola faapaiaina, o le ola ua vavaeseina mo le Alii. O lona

uiga ua le tatau ona toe i ai se feso'otaiga ma mea vaivai o le olaga sa masani ai. O le uiga lea o le fasiotia o itutino oi le lalolagi, o tuinanauga leaga o le tino o loo pulea e le tiapolo. O tuinanauga ia ua mana'omia ona fasioti e ala i le salamo faamaoni ma faatuatua i le Keriso toetu, ua manumalo i le tiapolo ma ana 'au.

## **4. Tuu ese e outou lava o nei mea uma (3:7-8)**

O le toe faatonuga lea o loo tuuina atu e le aposetolo ina ia ola ai Kerisiano i Kolose. 'Ia tuu ese' e outou lava nei mea uma. O loo faatatau i le ala e ao ona ola ai le Kerisiano, ina ia faagaloina e ala i le tuu eseina ma le loto mea leaga uma sa masani ai i le tuanai, i aso ao pule ai e tiapolo i le ola. O lona uiga o le ola ia Keriso, o le tuueseina lava lea o mea uma sa faalavelaveina ai le ola ofoina i le alii, a ua tuuina atu male atoatoa le tino, mafaufau ma le agaga i le Atua e ala ia Keriso.

## **O LE KERISIANO MA LE EKALEZIA (3:9-17)**

O le talitonuga o le aposetolo, o le Ekalesia o le 'foafoaga fou' a le Atua. O le soasaiete o tagata ua faafouina ma ua ola i le ola fou ia Keriso.

### **1. Le foafoaga fou**

O le foafoaga fou ua faatatau i le sosaiete o tagata ua faapea ona ola i le ola faafouina i le Alii, ma ua aveesea ai pa vaeloto i le va feagai ai o le tasi ma le isi. O le toeseina o le tagata tuai ma le ofuina o le tagata fou, o le faailoga o le fanaufouina ma ua faatatau ia

foliga i le na faia o ia. O lona uiga ua faapea ona tasi le faamoemoe o le aposetolo- o le Keriso ma le leleiga ua ia faaleleia ai mea o i le lagi ma mea o i le lalolagi i le toto o lona satauro. O le i ai lea o Keriso i mea uma, ua faapea ona talepeina ai paveloto o loo punitia ai le nofo lelei o tagata uma i totonu o le Ekalesia le tino o Keriso.

### **2. Le Isaraelu fou**

Na filifilia e le Atua Isaraelu e fai mona nuu, ae fai o IA ma Atua o Isaraelu. O le faamoemoe o le Atua ia faapea ona faia Isaraelu ma nuu ia faapaiaina mo IA. Ia ola e tusa ma lona alofa tunoa tele ma ia avea ma nuu e ala atu ai lana faaolataga mo nuu uma o le lalolagi. O le nuu na tofia e fai ma auauna faamaoni a le Atua ile va feagai ai ma isi nuu.

### **3. Le tasi o le Ekalesia**

O le faamoemoe atoa lea o le aposetolo o loo manino i fuaiupu e 9-17. O le naunautaiga o lona loto ia faamaoni le tasi i le isi ma ia fefaamagaloi i le mafutaga e faavae i le alofa ma le filemu o le Atua.

#### **i. 'A o le alofa, e lautua lea i nei mea uma' (3:14)**

O le alofa ua fai ma sootaga malosia e fusia ai le Ekalesia ina ia tasi. E le gata ia tasi ma le isi uso, a ua faapea ona sili ona taua le tasi ma Keriso i le faatuatua.

#### **ii. 'Ia pule foi le filemu mai ia Keriso i o outou loto' (3:15)**

O le filemu o Keriso poo le Atua ua faatatau lava i le talitonuga faa-Eperu o le filemu o le lagi o loo nonofo faatasi ai le afi ma vai e aunoa ma le fetineiai. E faapena

le loloto o le filemu o le Atua e tatau ona ola ai le Ekalesia a Keriso. E eseese uma tagata, a ua mafai ona nonofo faatasi ma feoeoeai o le tasi ma le isi i le alofa moni faa-le-Atua, ua talia ai e le tasi le isi uma faafetai i le alofa o le Atua.

### **O LE KERISIANO I LE AIGA (3:18-21)**

#### **1. O outou fafine, ia outou usiusitai atu ia outou lava tane (3:18)**

E le faigofie ona faamatalaina lenei a'oa'oga a le aposetolo, aemaise lava i le leotele mai o le aia tutusa o tagata uma i mea uma o le olaga. I foliga vaaia o lenei fuaiupu ma lona faaupuina, e vave ai lava ona faatupu se manatu e faapea o ituaiga a'oa'oga nei o loo mafua ai ona malosi le sauā o tane i avā, o matua i fanau ma matai i auauna. Peitai e i ai lava le mafuaaga ole faamuamua e Paulo o fafine, fanau ma pologa, nai lo tane, matua ma matai. O le talitonuga o loo a'oa'oina e le Feagaiga Fou se a'oa'oga i amio tatau (efika) faa-Kerisiano e faatauaina ai tagata o loo i tulaga lagolago i totonu o sosaiete e pei o tinā, fanau, ma pologa. O lona uiga, o le taua o lo latou soifua i le va feagai ma tane, matua ma matai, e tatau ai lava ona fautuaina i ala e tausia ai le nofo lelei o tagata uma i totonu o sosaiete. O le mea mautinoa, e le o le faatulagaina o le sosaiete poo ai e sili a o ai e maulalo, peitai o le fausiaina o se sosaiete manuia ma fiafia ina ua ola manuia tagata uma. Aua foi nei galo, o loo ogatotonu lava Keriso i le talitonuga o le aposetolo i le ola o

tagata faatuatua uma, ma e tatau ai lava ona ogatotonu ai foi le alofa i nei so'otaga uma i totonu o aiga.

#### **2. O outou tane, ia outou alolofa atu ia outou ava, aua foi nei faaonono ia te i latou (3:19)**

Lea la ua manino le faamoemoe o le aposetolo ina ia taoto lelei faavae o mafutaga i totonu o aiga. Ia ogatotonu lava le alofa i mea uma, ona faaitiitia foi lea o avanoa o le tiapolo e lepeti ai mafutaga matagofie i totonu o aiga.

#### **3. Outou le fanau, ia outou faalogo i o outou matua i mea uma, auā o le mea malie lea i le Alii (3:20)**

O le faalogo o fanau i matua o le faavae manuia lea o lo latou ola i le lumanai. Peitai oloo talanoa le aposetolo i le tulaga i totonu o aiga Kerisiano, o loo fausia e matua Kerisiano ma fanau ua a'oa'oina i le talalelei ia Iesu Keriso. O lona uiga o le tiute lava o fanau Kerisiano o le faalogo ma usitai i matua ina ua mautinoa o se mea malie lea i le Atua.

#### **4. Outou tama, aua nei faaita ia outou fanau (3:21)**

O loo silafia lelei e le aposetolo le faavae mautinoa o aiga lelei ma nuu lelei, e oo lava foi i atunuu ma le lalolagi, o ni fanau e lelei ona faufau o latou olaga i aoaoga ma aoaiga e faavae i le alofa o matua. O le uiga o le lagona, i fanau a'oa'oina lelei e fausia foi aiga lelei pe a oo ina matutua, ma faapea ona fausia nuu ma atunuu lelei, e oo lava i le Ekalesia. O le mafuaaga lea e tatau ai ona aua nei faaita le tamā i fanau. O le faaita e mafua

ai le ola fefe, le mautinoa, masalosalo, atoa foi male loto ita.

### **O LE KERISIANO O LE GALUEGA (3:22-4:1)**

#### **1. Ua faasaolotoina le pologa mai le 'faafiafia i tagata'**

O le uiga lea ole talalelei mo le pologa, o le saolotoga ua faasaolotoina ai o ia mai le ola le faamaoni i lana auunaga, ae maise lava pe a faia na ona 'faafiafia ai i tagata'. O le natura lava lea o pologa ua masani ai ina ia faasaoina mai ai i le faasalaina, pe maua ai foi se tau po se viiga. Peitai o le pologa ua faa-Kerisianoina ua liua le ola ma ua faia ai mea uma i le faatuatua faamaoni i le Atua e ala ia Iesu Keriso, ma faapea foi auauna ai ma le loto atoa i lona matai.

#### **2. Ua faasaolotoina le pologa ina ia auauna ma le faamaoni'**

O le saolotoga o le meaalofa mai le Atua mo lana fanau faatuatua, e aofia ai foi ma le pologa. O le talia o Keriso e ave ma faaola, o le faasaolotoina lava lea o le tagata mai ana agasala, ma faapea ona faafouina ai lona ola auauna. Mo le pologa, ua faapea ona faafouina ma faasaolotoina mai le agasala o le ola le faamaoni, a ua liliuina o ia e le mana faaola o Keriso e auauna ai ma le faamaoni e le gata i le Atua ae faapea foi i lona matai.

#### **3. Ua faasaolotoina le pologa mai galuega e aunoa ma se tau**

O le saolotoga ua faasaolotoina ai le pologa e le Alii, ua suia ai le ala

*(faaauau itulau 16)*

# ITULAU MO TUPULAGA TALAVOU

## AMATA I LE ATUA.

### O le a le uiga o lou ola?

O le fesili na matua toatele le au popoto na le mafai ona tali iai, talu ai o tali uma e amata i le tagata ma lona faamoemoe autu ia te ia lava. Lona atamai, lona malosi, mea ua ia maua lona mamalu ma isi mea. Peitai na fesili le isi tagata ae mauga i isi sa i luga o le mauga, poo fea e amata ai le ala tau i le tumutumu ae tali tagata e le amata atua ii, ae amata mai le isi itu. E faapena se ata e te maua i le tali i le uiga o lou ola. E le amata ia te oe, ae amata i le Atua na faia oe ma le faamoemoe ua e ola ai. E te malamalama i le uiga o lou ola i lou saili male loto faamaoni i le Atua.

Afai e te faatau sau masini tamera (ta lavalava) ae tei ua leaga alu atu le fai masini e fai, e muamua fesili ia te oe pe iai se tusi o le masini (owner's manual) tusi e faamalamalama ai totino o le masini. Poo le a lava lona tomai e tatau lava i le ona fesili pe vaai i le tala a le na faia le masini. Faapena lelei lou ola, a leaga ma fia maua se fesoasoani tatau ona e fesili i

le na faia oe. O le Atua na avatu ia te oe le ola, le malosi ma le iloa. Ae e te faitau i le Tusi Paia o le faasinoala lea e faatonu ma toe faalelei ai mea ua e faaletonu ai.

A e gaioi – faitau le **Esoto 20: 15** "Aua e te gaioi.

A e fia fasioti tagata – **Esoto 20: 13** "Aua e te fasioti tagata.

Afai e te faiaga ma le faamaoni i lau galuega faitau le **Luka 16: 10–13**. Ua e iloa le Tusi Paia,

ma e tautala foi i ai, ma e manatu faafiapoto ua e malamalama i ai ao lona afaina ia te oe e te le faitauina i le tele o taimi, ua nao le aso Sa e te alu ma oe i le lotu ae te le faitau iai pe a fai mai le faifeau e omiomi ma tosi solo ou lima lau telefoni. Ao le Tusi Paia o le faasinoala lea, mai le na faia oe ma au e faatonu ma faalelei ai lou afaina ma e iloa ai le uiga moni o lou ola. O oe o le faaaliga o le silisili ese o le alofa o le Atua i le lalolagi i mea uma o lana foafoaga.

∴ Aua na ona tatou fiafia e tau ma pese iai Iesu ae le moni le mafuata ma Iesu. Fai mai soo tagata o a'u ua faaolaina, soia aua le pepelo, **Faolaina** o le mea a le Atua mo le tagata, au

e tautala i le upu faaolaina, e tatau ona e amio faa Iesu lagona faa Iesu, ola faa –Iesu - Te le toe palauvale, te le toe inoino fua i le isi, ma muimui isi tagata. O le a e usitai, loto maualalo faamagalō, te le toe fai isi tagata ma au tavini, pe taufaavalea. A ua matua olaga o Iesu oe nei ma aso uma upu talafeagai ma le suiga o lou olaga "**Fanaufouina**" ua suia lou tagata tuai i le tagata fou i le amio ma le tautala ma faatinoga e fai. O se tusitala Rusia e le talitonu i le Atua (Atheist 27) tausaga malaga mai lona aiga i Petersburgy laumua o Rusia vaai pea i le matagofie o le siosiomaga ma ia manatu ai e iai se taimi e leai ai lenei matagofie.

Ae faafuasei ona oo mai le faaaliga i lona mafaufau. **E leai se uiga o le ola pe a leai le Atua.** Ona matua ia talitonu ai lea ma le loto atoa i le Atua toatasi faavavau.

"O le ola aunoa male Atua, ua leai sona taua, afai ua le taua leai foi la se uiga pe afai la ua leai se uiga o lou ola ona matua mautinoa ai lea ua leai foi se faamoemoe.

Ona avea loa lea o oe ma atigi pupu na ona taavalevale solo ua leai se aoga.

**Saunia:**

**Solomona Tuatagaloa**  
**(Faifeau Toeaina Penisione Malolo)**

---

# **FAILAUGA MO LE SULU SAMOA 2019**

---

	<b><u>MASINA</u></b>	<b><u>SUAFA</u></b>	<b><u>AULOTU</u></b>	<b><u>MATAGALUEGA</u></b>
1	IANUARI	KENETI LEAUPEPE (FS)	SAVAIA-UTA	AANA
2	FEPUARI	UTA MUAULU (FS)	FASITOO-UTA	MALUA
3	MATI	MALO AFIA (FS)	AUFAGA	LEPA-LOTOFAGA-ALEIPATA
4	APERILA	LETONE UILI (FS)	POUTASI	FALEALILI-SAFATA-SIUMU
5	ME	ESERA A. ESERA (FS)	SAPAPALII	FAASALELEAGA
6	IUNI	PANAPA F. TO'O (FS)	SASINA	ITUOTANE
7	IULAI	SI'U VAIFALE (FS)	SUVA	FITI
8	AOKUSO	ALAPI ETI (FS)	TAFUNA	AMERIKA SAMOA
9	SETEMA	KOLISI FAFAIFEAU	MALUA	
10	OKETOPA	FAITOAGA TOLUA (FS)	FAATONU	OFISA AOAOGA KERISIANO
11	NOVEMA	UTUTAU TAUATI (AM)	OFISA TUTOTONU	OFISA FAAMISIONARE
12	TESEMA	VAAI TUA (FS)	OFISA TUTOTONU	OFISA FAAMISIONARE

Fa'amolemole silasila ane i le fa'asologa o lo o fa'apipi'iina atu mo le masina ua atofaina mo lau susuga. Ia fa'ao'o mai lau lauga i le Ofisa o le Sulu Samoa poo le Ofisa o le Failautusi Aoa pe email mai i le [sulusamoa@cccs.org.ws](mailto:sulusamoa@cccs.org.ws), ao toe lua vaiaso o lumanai ai le masina e te lauga ai. Ma le faaaloalo lava. Faafetai.

---

*A Page for Youth*

## **ITULAU MO TUPULAGA TALAVOU**

---

### **“O OE MA LAU AMIO”**

O le mea na e luluina e te toe selesese foi iai i se aso. Afai e lelei na lulu e te selesese ma e maua le lelei ae afai e leaga e faapena foi ona e maua leaga.

Poo le mea e te faia i le isi tagata e faapena ona toe feagai ma oe.

E iai le Saina i Faasaleleaga i Savaii, e toaga e galue fai togā pi. Tuli atu e se lo'omatua lana tama e fai i le saina aumai ni pi e fai ai le latou meaa ai ae avatu i le isi aso le tupe. Ae fai mai le saina. A leai kupe, leai pi, faamolemole lava si tamaititi aumai taeao le tupe tasi lava le tala a le saina lea kupe leai pi.

Alu le saina e galue i lona toga toto i uta. Le lava le saina

savali mai i tai, ae o atu tama e toalua ma le la uili paelo, fai atu le saina faamolemole kama fia kiekie i kai, ae fai mai tama. A ke oe leai kupe leai kiekie e po o nofonofu le saina faatali se taavale e alu ai i tai o le mea e te faia i le isi e toe fai foi e se isi ia te oe i se aso.

“Alofa i le lua te tuaoi e pei o oe lava ia te oe.

Leai kupe leai pi, leai kupe leai kiekie.

**TUSIA:**

**Solomona Tuatagaloa  
(Faifeau Toeaina Penisione  
Malolo)**

\*\*\*\*\*

---

# O E UA FAI'ILAGI LE FOLAUGA

## Aliielua Tufi

O le alii tiakono. Na tuumalo i le Aso Gafua 29 Oketopa 2018 i le maota gasegase o Malietoa Tanumafili II i Tuasivi.

O le Aso Toonai 3 Novema na faia ai ona toe sauniga uma i lona maota, ma faai ai i lona oliolisaga tumau i lona tua maota. O a'u sa ta'ita'i i ona sauniga ma faia lona molimau faale-agaga, atoa ma le upu faamafanafana i lona ulua'i sauniga.

O le Susuga ia Falefa Savea FS na lauga i lona sauniga mulimuli, a o Li'o Matua Siaso na saunia talosaga ma fofogaina le Tusi Paia. O le tuafafine o Aliielua na saunia

le molimau, le tina ia Latafale Aliielua Meauli Su'a; o ia foi na lauina le molimau tusitusia a le atalii e toatasi o Aliielua o loo i Niu Sila, le tama o Meauli Aliielua Tufi. O le Susuga ia Papalii Ta'eu, tiakono, na molimau, faatasi ma le molimau a Auava Tualagi, ma le tina ia Tuileva, na fai ma sui o le aiga.

E le'i faigofie ia Aliielua le tauaveina o lona tofi ona sa fai toatasi lava aua ua le faamaoni lona toalua sa la mafuta. Ui lava i lea faaletonu na tula'i mai i lo la aiga, e le'i afaina ai le maualuga o le faatinoga o le monotaga faamatafale a Aliielua, ona o le tautua lelei a lona tuafafine ia Latafale ma si ana fanau.

O Aliielua, o se auauna e le lagona sona leo, ae galue gugu. E fiafia i le faatinoina o ona tiute i taimi e tofia ai. Pau lava si ona vaivaiga, e le popole i le tausaiaina lelei o lona soifua maloloina, ma o le mafuaaga lava lea ua vave ai ona manava lana auaunaga, ona o si ona faatamala i le tausiga o lona soifua maloloina. Tau ia ina ia silasila fofoga alofa o le Atua i le faigamalaga a lana auauna vaivai, ma faaulufale i lona malo e faavavau. Faamaise foi le Agaga o le Atua i le tina matua ia Valu Aliielua Meauli Su'a, faapea si ona tuafafine e toatasi ia Latafale ma si ana fanau.

Tofa Aliielua Tufi, alofaaga mai lau faifeau.

**Esera A. Esera (FS)  
EFKS Sapapalii**

\*\*\*\*\*

---

## IETITAIA SI'ULEPA

(10:03:1942 - 08:05:2018)

O le Afioga i le Ti'akono, o se tasi o tua'a sinasina i le 'Aulotu ma le nu'u o Western Springs EFKS. Sa fa'ati'akonoina ma lona faletua o Emi e le Toea'ina o Siaso Ieriko i Grey Lynn, i le aso 21 Novema 1982. Ma te taunu'u mai i le 'aulotu i le aso 19 Fepuari 2000, ua leva 'ona galulue Ietitaia ma lona 'aiga i le nu'u nei ma o nisi sa fa'avaeina le 'Aulotu. O ia sa Ta'ita'iina le 'Au Asafo, aua o se Tamā e fiafia ma fa'amaoni i lana taleni o le faipese.

O Ieti ma lona 'aiga sa feagai ma le tausiga o lo matou 'aiga i le tele

o aso i taumafa, ma la te le 'aivaleina se mea la te maua. Ma o se tamā e lotomauualalo ma lē lagona sona leo i fonotaga a le 'aulotu, 'ae leotele ana galuega fa'atino. O le Molimau ola o le lotomauualalo ma le loto mama o Ietitaia, e tu'ua le malo e le Afioga i le ti'akono, ua fiu lona 'aiga ma le 'aiga o lona faletua e tauanau e matai, na te le talia 'ae sa ia fa'ase'e i le tane a lona afafine le suafa. O se tama e galue fiafia ma faimealelei e le mana'o e sili atu se tasi, i mea nate faia mo le Talalelei.

E fai taulaga fiafia ma foa'i mo le atina'eina o le Galuega a le Atua i so'o se Vaega, aua e na o le Mafutaga lava a Tinā e le a'afia ai Ieti. O ia sa feagai ma le saunia o

Pese a le A'oga Aso Sa a'o le'i fa'ata'otolia i lona gasegase.

E mautū le 'aiga o le tamā ia Ietitaia, auā e to'a 8 le la fanau, 30 fanau a fanau, 'ae 13 fanau a fanau a fanau. O matua o Ietitaia o le Faife'au o Si'ulepa Si'ulepa o Satalo i Falealili, ma Iokapeta o Vaie'e Safata.

E tu'ua le malo e le Afioga i le ti'akono i le aso 8 Me 2018 i lona maota i Avondale i le itula 10.30 i le po, ua i Malua le Usugafonoa le 'aufaigaluega o le Pulega. O se tasi o tama matua o le Pulega, sa le tu'uaunoaina i Asiasiga a le Toea'ina o le Pulega. Ma o le mafua'aga lea o le lē auai o le Pulega i ona toe Sauniga.

O lona Sauniga Fa'ale-'aiga, sa faia lava i le Malumalu i Peteli,

---

# O E UA FAI'ILAGI LE FOLAUGA

## IETITAIA SI'ULEPA

(10:03:1942 - 08:05:2018)

EFKS Western Springs i Westmere, i le aso 14 o Me, 2018. Sa ta'ita'i ma faia le 'Upu fa'amafanafana e le Faiife'au o Afa Talaga (FS), o Talosaga na saunia e Ps. Soi Talooema'agao, a'o le Tusi Pa'ia na fofogaina e Taliaoa Sanerivi (AF).

O ona toe Sauniga sa faia lava i Peteli i le aso 16 Me, 2018 sa 'ou ta'ita'iina, 'ae fa'aulufaleina lona Sa e le Toea'ina o Mafutaga Fa'aleaoga (FT). Talosaga na saunia e Taliaoa Sanerivi (AF), a'o le Tusi Pa'ia na feagai ma Seiuli Toelupe (AF). Sa Molimau le tinā ia Emi Si'ulepa, e tusa o le la mafutaga ma si ona to'alua i nei mau tausaga e tele. O Vaeila Afa Talaga na molimau i le soifua tautua o Ieti i totonu o le 'aiga o lana fanau i le vao ma le sami i aso

uma. Ma 'ou fa'ai'uina ai i lona soifua aoga ma lana tautua mo Iesu Keriso ma lana Talalelei.

Ona matou fa'ai'u ai lea i lona toe Sauniga i lona Oliolisaga tumau i le Fanau Fa'atausau i Mangere, Aukilani, ma fa'amavae atu ai i le Pese masani a le 'Au Kerisiano.... "Talofa uso e, tofaina 'oe, ua sau le itupo e malolo".

Io! Ietitaia o le a e malolo i le 'Moe' a le Kerisiano fa'amaoni, e alafa'i mai i Fa'amanuiaga mo le tagata sa galue tautiga mo Keriso ma lona Finagalō.

Manuia lau Malaga!

**Saunia: Vagatai Va'aelua (FS)  
EFKS Western Springs,  
Auckland NZ.**

---

## SALIMA AMILALE


O se tasi o tiakono ua matua lona soifua auaua, e faatusaina i se laau mafala sa malu ai le galuega o le Talalelei, sa iloa ai foi le nuu i lana tautua i le taimi o lona malosi e ola i le fā'agatama o le kirikiti. Na soifua mai Salima i le aso 13 Iuni 1940 ae tu'umalo i se gasegase oso faafuasei i le aso Tofi 15 Novema, 2018. O ona matua o Salima Tavita Amilale ma Sināle'u'unu Leo. Na faaipoipo atu ia Litia Matafeo o Asaga, ma foaiina ai e le Atua iā i laua se fanau e to'a sefululua (12) O le afiafi o le Aso Sa, 25 Novema 2018 i le 4pm na molimoli atu ai lona sa i le malumalu o Mataniu Feagaimaleata mai le maota maliu o Pa'u i Safotulafai, mo lona ulua'i

sauniga. O le Susuga i le A'oa'o Fesoasoani ia Tofa Lio Foleni na fofogaina le Tusi Paia, o le Susuga i le faifeau o Falefa Savea (FS) na saunia Talosaga, ao a'u na ta'ita'i ma faia isi vaega uma o le sauniga. O se sauniga sa matua faatumulia ai le mamalu, ona o le to'atele o Paolo ma tau aiga o le tamā ia Salima mai tumua faapea ma atunuu i fafo na auai uma mai, ona e faimai la latou mau, o se tama osi aiga tele le tofa ia Salima ae maise ai o se tagata sa tautaua ai le aiga ma iloa ai le nuu ia Samoa ma atunuu i fafo, i lenei lava taaloga o le Kirikiti, i lona igoa o Amilale. O molimau o lona uluai sauniga e 18, e aofia ai le fanau e to'a fa (Amilale, Peka, Sieni, Finau) ma fanau a fanau e matua to'atele nauā ma le latou pese na usu. :O Amilale le tamā ma lana fanau, e to'atele naunau, o oe le isi o au le isi ia viia ai Iesu.." malie

tele le pese a le fanau, ona o le moni ma le faamaoni auā e 37 fanau a fanau, ae pe 12 ea le aofai o fanau a fanau a fanau (Great grand children). O fanau lava nei a si toeaina e tumu tele ai la matou A'oga Aso Sa. O isi molimau, o le aiga potopoto, o Paolo, ma le matou nuu.

O lona toe sauniga i le 9:30 i le taeao o le aso Gafua 26 Novema 2018, na toe fa'aulufale lona sa i le malumalu e le susuga i le faifeau faiaoga mai le Kolisi faa faifeau i Malua, le susuga ia Makesi Su Makesi, o le susuga i le A'oa'o Faai'uso o Harry Cowley na fofogaina le Tusi Paia, o le isi Faai'uso ia Peia Lesatele na saunia talosaga, ao le isi faaiuso ia Fiso Iakisa na saunia le lauga faamafanafana. Sa fai si a'u faaopoopoga pu'upu'u lava i le feau fa'amafanafana, ma ta'ita'i le sauniga.

# O E UA FAI'ILAGI LE FOLAUGA



**SALIMA  
AMILALE**

O le tinā ia Litia Salima Amilale na molimau i le la mafutaga male tamā ia Salima, sosoo ai ma le molimau a le Susuga i le Sea malolo manumalo, le Susuga ia Savaii Loto, ona taualuga lea i molimau a si tinā talavou nofotane o Titi Amilale, ma si faiava A'oa'o Faaiuso i Malua o Kilepoa Ioane; o molimau sili ia le malie male faamaoni aua na la tautino lava le tele o avega o le mafaufau na la faaopoopo atu i le tamā ia Salima; na soiso'i le faapotopotoga ma faapea ifo, o i laua isi tagata ia ua vave ai ona alu le malaga a si toeaina o Salima. Ina ua maea ona matou faamavae ma faatofa atu i le tamā ia Salima i lona Oliolisaga tumau, ona mapu ane lea i le vai mālū ma se taumafataga tele na saunia e aiga. O faaaloaloga na aao i ai le aiga e maoae le maualuga i ona itu uma




**ALIHELUA TUFU**

lava, ma e na sopoutu lava le faaso'o i le Au faigaluega Faifeau, A'oa'o, Aufaipese, Mafutaga a tinā, ae maise foi latou te lei ta'ia i fale le to'atele o a latou Lupe Faalele, e aofia ai ma le Afioga i le Peresetene o le Ekalesia Metotisi le Susuga ia Apineru Lafai Tavita. O le faaaloalo a le aiga i le Kolisi Faafaifeau i Malua na tulaga ese, ona o lo latou auai mai ua maualuga ma mamalu ai le aso o Salima. Na matou faaiu i le pese "Ia faatasi pea Iesu ma oe.." ma le tatalo faamanuia.

Faamaise le Atua i le tinā ia Litia ma si fanau. Manuia tele lau malaga Salima. E manatua pea lau tautua lelei ma lou finau mo mea sili e faaea ai lou aiga le nuu male ekalesia. Malo faafetai le faitaulaga lelei.

**Saunia: Esera A. Esera (FS)  
EFKS Sapapalii**



**IETTIA  
SI'UPEPA**

*(mai le itulau 11)*

ua ia ola ai ma faatinoina ai lana auauanga. O le apoapoiga a le aposetolo, ia faia lava male faamaoni ina ua mautinoa o loo faia lava i le Alii. O le mafuaaga foi lea na te maua ai le tau'i o lana uauanaga mai le Alii, e tusa lava pe le o totogiina o ia e lona matai.

**UPU FAAIU:**

O le tamaoiga o lenei mataupu ole tusi o Kolose ua le mafai lava ona ausia e le taumafaiga vaivai a le auauna. A o tatalo ina ia galue pea le mana o le Agaga Paia i finagalo o le Mafutaga ina ia i ai se aoga mo le soifua auauna i le Atua e ala i lana Ekalesia. Ia manuia le Mafutaga ile alofa male agalelei o le Atua. Ia faatumauina pea i le Atua le Viiga male Faamanu, nei ma se ia oo i le faavavau faavavau lava.. AMENE.

\*\*\*\*\*